

## **Мұхтар Әуезов**

### **КОРГАНСЫЗДЫҢ КҮНІ**

С. қаласының оңтүстігін жайлаған елдің қалаға қатынасатын қара жолының үстінде Арқалық деген тау бар. Дағаның көңілсіз ұзақ жолында қажып келе жатқан керуенге Арқалық алыстан көрініп, дәмелендіріп тұрады. Жолдың аузында көлденең созылып жатқан тұрқы он шақырымдай болғанмен, енсіз кереге сықылды, жалғыз тау. Не бауыры, не сыртында ықтыртын жоқ ысқаяқ. Арқалық жадағай, жалғыз қабат болған соң, қыс күнінде жел терісінен соқса да, онынан соқса да паналығы жоқ азынап тұрады. Қыстың басынан екі жағын қар алып, жұмыртқадай қылышпегін тастайды.

Сондықтан өзге жер ашық болып тұрғанда, Арқалықтың бауыры көбінесе бораннан босамайтын. Алыстан қарағанда да Арқалық бұздыры жоқ жалаңаш. Көруге аса көңілсіз.

Жыл сайын қыс басынан қарлы болып, малға панаңы жоқ болғандықтан, бауырын жайлаған ел малын өлтіріп, өзге ел аман отырғанда, шолақ жұттың құрығынан құтылмайтын. Сондықтан бауырын мекен қылған ел көбінесе кедей болатын. Бұл жерді мекен қылған ел ерте күннен аталарының қонысы болғандықтан және басқа ірге аудараплық жайларынан жері жоқтықтан, «құдайына жылап» отыра беретін. Бұлардың жалғыз-ақ медеу қылатыны Арқалықтың егіндігі еді. Бауыр сыртының шымы тұтас, кәделі жер болғандықтан, үй басының салған бірлі-жарымды бәлтек егіні тәуір болып шығып, ұзақ қысқа қорек қылатыны сол болушы еді. Арқалықтың бұл айтылған

жайлары оңтүстігін жайлаған Уақпен көршілес үш-төрт болыс елге белгілі болатын. Бұған себеп - Арқалықтың сырт елдер қалаға қатынасатын қара жолдың үстінде болғандығы. Өткен-кеткен керуен ұзақ жолда не көлігі талып шалдығып, не өзі шаршап қажып келе жатқанда қадаулы қоналқалық, не түстіктік жері Арқалық болады.

Арқалықтың жолы асатын кезең - Күшікбай кезеңі деп аталады. Күшікбай - Арқалықты қыстайтын бес - алты ауылдың атасы. Өзі батыр болған адам дейді. Дәл қара жолдың аузында, Арқалықтың бір кішілеу биігінің басында тастан үйген оба секілді жалғыз мола бар. Сол мола Күшікбай батырдікі. Кезең де сол себепті Күшікбай атымен аталған.

Күшікбайдың кім екендігін, басынан қандай дәурен кешкендігін әрлі-берлі өтіп жүрген керуеннің көбі білуші еді. Оларға білдіретін заманның шежіресі – дәурені өтіп кедейлік басқан, көңілсіз салқын өмірге түскен кәрілер болатын. Бұдан соңғы білдірушілердің көбі өткен-кеткен керуенге көп сөйлесіп дағдыланған, ауыл иесі болған соң, алдынан ешкім шықпай, жаман әдеттеніп, өтірікшілеу болған адамдар болатын. Бұлардың көбі әңгіме айтудан бұрын, азырақ шарт керек қылышы еді. Алдымен күндізгі мазасыз суық пен қар басқан көңілсіз елсіз даладан құтылған болу керек. Өнбейтін азын-аулақ малдың сонынан жүріп, әрі іш пыстырып, әрі қинаған бейнеттен серпіліп, күн бата үйіне келуіне керек. Екінші, көлігіне, өзіне азық сұрап, шығын шығаратын жат керуен жоқ болсын. Сол кезде үйінде бірлі-жарым көңілі сүйетін, сыйлайтын қонағы болуы керек. Ақсақал мал қоралап болып, жайланып шайын ішіп, қазанаспаның аузында кейде жылтылдаپ, кейде лапылдаپ жанып жатқан отты көріп,

бұрқылдаپ қайнап жатқан еттің исі мұрнына келіп отырғанда, серпіліп әңгіме айтатын.

Жолдан қажып келіп, тынығып, жантайып жатқан салбыраңқы, күңгірт пішінді жолаушылар бастарын көтерсе де, жарым-жартылап қалғи отырып, әңгіме тыңдаушы еді.

Міне осындай көңілді жайдың бірінде өткен күндердің көп әңгімесін еске түсіріп отырып, әңгімеші ақсақал сөз арасында Күшікбайдың тарихын сөйлеуші еді.

- Күшікбай батыр жиырма бір жасында дүние салған екен. Ерте күннен жортуылға аттанып, Уақтың көп батырларының арасында бұғанасы қатпағандығына қарамай, талай қиын-қыстауда ақыл тауып, қажымай қайрат, ерлік көрсеткен. Осындай өнерінің арқасында ерте күннен батыр атын алған екен. Соңғы жылдарда көздеген мақсаты қолбасылық болып, аяғында оған да жетіп, егескен елінен кегін алыш, егер қылып жүргенде шешек шығыпты. Шешек ауыр болып, төсекте қозғала алмай, көп уақыт жатып қалған. Сол кезде Күшікбай ауырып жатыр дегенді естіп, талайдан өшін ала алмай жүрген Уақтың бір батыры жауының жанын ауыртпақ болып, белдеуде байлаулы тұрған қызыл бесті деген атын тал түсте тартып алыш кетіпті. «Пәленше атынды алыш кетті» деген ағайынның жетімсіген сөзін естігенде, жаны шыдамай, ауруымен алышып, жылқыдан ат алғызып, жалаңаш етіне бір шекпенді кие салыш, жауының артынан қуып кетіпті. «Батырды мұқаттым» деп, үйіне келіп, жаңа жайланаң, жауы отырғанда Күшікбай атын ойнақтатып, найзасын түйілтіп, өрт сөндіргендей болып зәрін шашып, жетіп келген. Сол бетімен ауылдағы самсаған сары қолға: «соғысамын, қан төгемін» деп әлек

салған. Бірақ жылған елдің ішіндегі басты адамдар: «Уақтың баласы бірін-бірі өлтіріп араздаспасын» деп, ат-шапан айыбымен Күшікбайдың атын қайырыпты. Батыр еліне қайта қайтқанда, ауруы мендей бастап, атқа әрең жүріп, осы күнгі бейіті тұрған биіктің басына келгенде мұршасы құрып, найзасын тіреп аттан түсіпті. Сонан соң басын оңға қаратуға ғана шамасы келіп, жан-тәсілім қылған. Артынан ағайын-туғаны жылап барса, шешегінің ауыздарын шекпен қажап, қотырының суы шекпеннің сыртына шып-шып шығып кеткен еken дейді. Батырдың көп мұратына жете алмай, жас күнінде қуаты қайнап, долданып өлгендігінен моласы тұрған биіктің бауырынан боран, ызғар айықпайтын болған еken деп, бағанағы кәрі әңгімесін тоқтатушы еді.

Бұл әңгімені айтушы адамдар Күшікбайдың кім еkenін жүртқа танытқанда, өзінің сол батырдың ұрпағы екендігін көңіліне бірталай қанағат қылып, бойы көтеріліп, көңлі күнгірт өмірдің уайымынан бірталай сергіп қалушы еді...

Январь айының аяқ кезі. Күн батуға тақап қалған мезгіл. Күнбатыс батуға айналған күннің қызығылт сәулесімен нұрланып, қызыл торғынның түсіндей болып тұр. Күнге жақын тұрған ұзынша, жұқалаң бұлттардың түсі қалың өртке қызған темірдей қып-қызыл. Төбеге жақын тұрған алысырақ бұлттардың бір-бір жағы ғана жұқалаң қызылға боялған асыл нұрдың буын ғана жалатқандай. Қызығылт сәулесін дүниеге жайып тұрған күн шарасымен тұтас көрініп тұр. Аспан ашық. Берірек тұрған аз ғана ала-шұбар бұлттар кең жаһанның жүзіне перде болған жоқ. Күні бойы тыныш болған жел Күшікбайдың бауырында ғана ызғырықтап жаңадан жауған көбік

қарды жаяу борасында тып тұр. Күннің қызыл сөулесі даланы да, тауды да өз өніне кіргізген. Күнбатыс жақтан бораған ұсақ қар да күн астынан қызғылттанып көрінеді.

Жоғарыда айтылған Күшікбайдан асатын қара жолдың үстінде Арқалықты бетіне алышп, қала жақтан бір пар атты келе жатыр. Жайдақ сары шанаға биіктеп салған жеңіл жүгі бар, жақсы киінген екі жігіт. Сылаң еті бар екі қоңыр ат қажығандығын білдірмей, көшір жігіт божы қаққан сайын ығыса жөнеліп, сар желіп келе жатыр.

Жолаушының бірінің торғын тұсты жаңа тұлкі тымағы бар. Қалың киімнің сыртынан киген мол сұр шапанының жағасы қара барқыт. Аяғында байпағының қонышын барқытпен көмкерген жаңа қара етік. Алғашқы көрген жерден-ақ «мынау мырзасы екен» дегізгендей.

Бұл жігіттің жасы отыз шамасында. Орта бойлы, дөңгелек денелі, қысқалау мұртты, шоқша сақалды, сұрғылт беті дөңгелек, жалпақтау. Суық қарайтын қисық біткен, кішілеу өткір көзінде және тұксиген қабағында өзгеше қаталдық бар. Кішкене мұрны көз, қабағына үйлеспейді. Бұл адамның күлгендегі пішіні құмарлыққа көп салынғандығын білдіріп тұрады.

Бұл жігіт - Ж.-ның болысы Ақан мырза. Қалаға қазынаның алымын салуға барып, жұмыстарын түгел бітіріп, үйіне қайтып келе жатқан беті. Қасындағы Қалтай - ерте күннен жанынан тастамайтын жолдасы. Ақан болыс болғаннан бері қарай атшабар қылып, бұрынғысынан да жақын ұстайтын. Қалтай аса пысық, сөзге ұста, қалжыңқой, әсіресе Ақанның түндегі жүрісіне өте ыңғайлы, әрі жылпос, әрі тілді ер жігіт еді.

Ақан күні бойы жолда көп сөйлемей, бір нәрсені қадалып ойланғандай болып отырды. Бірақ тұпсіз терең ойдың түйінін шеше алмай отырған кісінің пішініне түскенмен, Ақанның ойы қай жерде жүретіні белгілі еді. Ол көбінесе осындай қадалып ойлағанда, қиялында бір сұлу әйелдің суретін тауып алып, соған пәлендей деп сөйлесіп әзілдессем, сондай қылыш құшақтасам, сүйсем деп, соны ермек қылушы еді. Қалтай мырзасының не ойлайтынын білсе де, ерте күннен жалтаң болып өскендіктен, ашуланып қала ма деп қорғалақтап, жанын ауыртатын сөздерді бұндай күйде айтпайтын. Сондықтан Ақан үндемегенде, о да үндемей отырады.

Жолаушылар күні бойы тоңбай келсе де, кешке жақын күн суытыңқырап, Қүшікбай бауырының ызғырығы қатайған соң, тоңази бастады.

Божы ұстап отырған Қалтай бетін уқалап, кішкене қозғалып, Ақанға қарап:

- Батыр-ау, мына Қүшікбай «мені өлтірген шешек - осы Ж. қаласы» дей ме? Немене: бір емес, екі емес, ызғырықтайды да тұрады, - деп күлді. Ақан да түсі жадыранқырап күліп, аз сергіп қалды. Біраз уақыт өткен соң, тағы да үндемей, күні бойғы әдетпен тұнжыраса бастады.

Осылай алыс жолдан жалығып, тоңып, ығы кетіп қырындал келе жатқан жолаушыларға Қүшікбай кезеңінің түбінде бір жіңішке қара сызық секілденіп Қанайдың жалғыз қорасы көрінді. Ұзак жол қажытқан жолаушылар осы болымсыз кішкене сызыққа қарап, қоналқаға келетін үйінің әр түрлі көнілсіз жайларын есіне түсірді. Бұрынғыдан да тұнжырады. Көнілсіздік молайды.

Қанайдың қорасы керуен қасына келгенге шейін, жан иесінің мекені екендігін білдірмейді. Иесіз азырап, ұмытылып қалған бірдене секілді. Қорадан жарты шақырымдай жерде басы қара қожалақ болған кішкене төбешіктің үстінде томпайып жатқан бір үлкен кісінің, бір баланың бейіті бар. Жолаушылар өтіп бара жатып, әлгі бейіттерге қарап ауыздары күбірлеп, тоңған қолдарын көтеріп, беттерін сипап, бата қылады. Күшікбайдың басынан соққан боран жаңадан шыққан бейітті қармен көміп, қараушының көзінен тез жасырудың қарекетін істеп жатыр. Иесінің дүниеге келгенін сездіретін ақырғы белгісі - томпиған бейіт аз уақытта жоғалмақ, із бітпек. Таудан аса соққан жел, бейіт тұрған төбешіктің басында әсіресе қатты ызғырықтанады; бейіттің тау жағынан топырағын ұшырып, екінші жағына жалданған қармен басып жатыр. Аз уақытта бейітті түгелімен қар көмгендей. Кейде себелеп, сырғып өтіп жатқан ұсақ қар өзінің мейірімсіз, ырзасыз, бірақ еркін бір күә екендігін білдіріп тұр.

Бейіттен жарты шақырымдай жерде тұрған екі кішкене қора да бейіт секілді мұләйім пішінденген. Тозығы әбден жетіп, ескіргенін төбесі де сездіреді. Қыры кетіп, жұмырланған бұрыш-бұрышында үйіліп қалған қорда топырақ қораның онсыз да аласа бойын жермен-жексен қылып тұр. Жан-жағына үйілген қар, қыс басынан бір күрелмегендіктен, қораның үстіне шығып, біржолата басып алған. Аз күнде қораны көзден жоғалтуға айналған.

Бұл күйден аманырақ болған есіктің ғана алды. Кішкене тар күресіні бар. Қыстау айналасының әл-гідей пішінінің үстіне, теріскей жақ бұрышындағы бір қораның төбесі ортасына түсіп, таудан аса

соққан боран әлгі тесіктің үстінде ақ тұтектеніп, бірсеке тұтін секілденіп ұйтқып, бірсеке қиыршықтанған ұсақ қарын ішке себездеп төгіп, қораның ішін толтыруға тырысып жатыр. Тау жақтағы пішен қораның ішінде бір-екі шошақтай ғана тапталған аз пішен бар. Бұнда сауырсын жотасының бәрі қар болған бір арық қызыл торпақ және екі-үш жаман тоқты тұр.

Қораның сыртынан білініп тұрған осы секілді көңілсіз қүйін көрген адам «бейшара, мынау қандай сорлының қорасы екен?» деп еріксіз айтқандай. Мұны ойлаған адам үйге кіріп, қораны мекен қылған адамдарды көргенде, әлгі ойының шындығына көзі жетуші еді.

Күндізгі біз көрген жолаушылар күн батып, қой қоралаған мезгілде осы қораның алдына келіп тоқтады. Шанадан түсіп, үстерінің қарын сілкіп болған соң, Ақан мырза қораның сиқын көріп, көңілсізденіп:

- Қалтай, осы үйге қайдан әкелдің? Кісі отырарлық жері де бар деймісің, басқа үйлердің біріне бар-май, - деді.

Қалтай атты доғарып жатып:

- Үндеме, неге әкелгенімді кейін білерсің, - деді. Құлағына жайлы хабар тиген соң, Ақан үйге кіруге асыға бастады. Аты доғарылды. Енді қонақтар қараңғы қораның ішіне кіріп, қабырғаны сипалап жүріп, есікті тауып алышп, үйге кірді.

Үй ауыз үй, төр үй ретінде салған екі бөлмелі екен. Бірақ ауыздағы бөлме затында үйге арналып салынса да, қазіргі қалпында үйліктен шығып, әрі шошала, әрі қораның міндетін атқарып тұр. Үйліктің белгісі терезенің жалғыз әйнегін жапсырып койған тесіктен

және жылтылдаپ от шығып жатқан бір бұрыштағы кішкене қазана спадан ғана білінеді. Іші қараңғы. Бұрыш-бұрышында аяздаған қар, қабырғасы қара балшықпен сыланған кір. Төбесіне жапқан сырғауыл қарайған, түгел ыстан қап-қара. Терезе жақтағы бір бұрышында жаңа туған бір қозы және арқасына киіз таңып қойған бір арық қызыл торпақ тұр. Төр үйдің іші бұдан гөрі аз көңілдірек. Көп тұрғандықтан, май болып кірлеп, қарайып кеткен кішкене, тар тесіктен кіргенде, оң жақ бұрышта ешбір сәнсіз, ретсіз үйіле салған үлкен пеш бар. Одан жоғары бояуы көшіңкіреген ағаш төсек. Үстінде іждиhattы қолмен жиылған сұрғылт тұсті көнетоздау екі-үш көрпе, жастық. Есікке қарсы төрде кішкене жүқаяқтың үстінде екі ескі сандық, үйдің қалған жерінде бөтен еш нәрсе жоқ. Төр дегені - екі-үш кез ғана жерге жайылған ескі күрым киіз. Соның үстінде бір-екі ескілеу сырмақ. Үй ішінің барлық жасауы - осы. Бұл үйдің де қабырғасы, көп жылдардан бері сыланбағандықтан, әр жерінен қара балшығы шығып, кір болып, қожалақтанып тұр. Пештің де өне бойы не күйе немесе қожалақ болып, кей жерлерінің кәрнезі сынған - о да тозығы жеткендігін білдіргендей. Оңтүстікке қараған екі көзі жамаулы кішкене терезеге тау желі гуілдеп соғып, әр жеріндегі тесігінен тыстағы суық бу болып кіріп тұр. Көздерінің бәрін қырау басқан аппақ пештің қырында тұрған кішкентай жалаңбас лампының жалпылдаپ жанған болымсыз жарығы үй ішінің қараңғылығын зорға женіп, аз ғана елпілдеп, күнгірт, қызғылт сәулесін түсіреді.

Бұл үйдің барлық жаны - үш-ақ әйел. Пештің жанында бірінебірі тығылып, бүрсіп отыр. Әйелдердің біреуі - сексеннен асқан, кәрілігі әбден жеткен кемпір, екіншісі қырықтың шамасындағы әйел,

ұшіншісі он үш жастағы қыз. Кемпірдің жасы қартайып, қуаты азайғандығы шын болса да, бетінде ерекше бір қайрат білінеді, ереккі пішіндес кесек. Үлкен, жалпақ мандалы, қошқар тұмсықтау келген үлкен мұрынды. Тақырлау сұйық қабақтың астынан көрінген кішкене өткір көздері қажыған салқын жана рмен жалтылдайды. Мандалы мен екі ұртына тұсken қатпары қалың терең ажымдары өмірінің талай қайғы, талай бейнетіне қуә. Бұл кемпір осы үйдің қазіргі қожасы. Ана әйелдін біреуі - келіні, біреуі -сол келіннен туған немере қызы. Келіннің пішінінде не жақсылығына, не жаманшылығына айғақ болған орасан белгі жоқ: орта пішінді, орташа жаратылған адам тәрізді. Бірақ бұның пішінінде де өзгеден бөтен бір жаттық бар. Қадағалап қараған кісіге ол көрінетін. Тұңғиық қара көздері бір қараған жерден аумай, ылғи жансыздықпен қарап тұрғанына көзі тұсken адам бейшараның кім екенін айыруши еді. Ол жаңа арада екі көзінен айырылған суқараңғы еді. Бұл екі әйелге ермек, жұбаныш болып отырған - жас қыз. Ол - сыпайы, нәзік болып өскен Газиза: жінішке сұңғақ бойлы, азғана секпілі бар, дөңгелек аксүр жүзді Газиза. Көрген көзге алғашқы жерден-ақ сүйкімділігін сездіретін уыз жас. Жалғыз-ақ ұян, жұмсақ қарайтын қара көзінде және ылғи шытынған, кірбендерген қабағында қалың уайымның салған ізі бар. Пішіні - мұнды, жүдеу. Жас басына орнаған қайғы, жүрегін жеген дерпт сыртына шығып тұр.

Бұл баланың уайымы не? Уайымы - осы үйдегі үш әйелге ортақ болған жесірлік пен жетімдік. Бұлардың басынан тағдыр дауылы жаңада ғана соғып өткен. Кораның алдындағы жас бейіттер сол дауылдың салдарынан туған. Бұл әйелдердің қуаныш-қызығы да,

ұміт-қорғаны да сол сүйк қабырға өліктермен бірге көмілген. Ол қабырда жатқан - Ғазизаның әкесі Жақып және жаны туысқан, жалғыз кішкене бауыры - Мұқаш. Осы бүгінгі кештен бір ай бұрын әкесі мен бауыры қабат жығылып, сүзек болды. Ғазизаның ағам өлсе, күнім не болады деп, күндіз-түні бірдей тыным алмай, құдайға құпия сыйырлап, онша жерлерде тыста жүріп өксіп-өксіп жылағаны, кемпір әжесінің мойнына бұршағын салып, ата-бабасының аруағына жалбарынғаны себеп болмай, екеуі де өлген.

Иесіз қорада қуатсыз, қорғансыз үш әйел құлазып, зарлап қалғанда, маңайынан жиылған көрші-қолаңшы ғазиздерінің сүйегін сүйк қабырға салғанын ойлағанда, әрқашан Ғазизаның жүрегі шаншып, өні қашып, көзінен ыстық жасы тамшылап кетуші еді.

Бұл бала жасынан әкесінің жалғыздығын, ағайындарының достығы жоқ қаттылығын ойладап, сыртына шығарып ешкімге айтпаса да, сол әкесіне жаны ашып, тілеуін тілеумен өскен. Ол көңілді болған уақытта бұл да көңілденіп, қуанып отырушы еді. Жасынан сезімді бала зерделілігімен әкесінің жалғыздығын, шаруасының нашарлығын ұғып, соған қолынан келгенше көмек қылғысы келіп тұратынын сезген соң, үй іші түгелімен Ғазизаны әлпештеуші еді.

Бұрын әкесі тартатын ауыртпалықтың бәрі бұл күнде Ғазизаның өз басына түскең. Ерекк істейтін шаруаның бәрін өзі істейтін болып, әлі келгенше үйінің барлық шаруасын ұстап тұрған - өзі. Соңғы аз уақыттан бері бұл қызметінің үстіне, тағы үй ішіндегі бар жұмыс масыл болып мойнына мінді. Бұрын тыстағы шаруасына да көмегі тиіп, үйдегі барлық шаруаны жайлап отырған шешесі жиырма күннен бері көзінен айырылып, соқыр болды. Жақыптың тірі кезінде көзі

анда-санда ауырып қалып; «шөп түсті», «көз ауру болдым», «желге асқынып кетті» деп жүре беруші еді. Жақып өліп, көп жылаған соң сол көзі аз күнде суқараңғы болды. Үй ішінің қайғысы бұрынғысынан да асты. Жетім-жесірге ес болып отырған кемпір басынан қара тұман айықпай, үсті-үстіне қайғы жауып, қабат қаза көрген соң құдайға, тағдырға наңған көңілмен бір уақыт шын жалбарынып, назаланып: «Құдай-ау, не күнә сұмдығымнан осындай қазаға душар қылдың? Не жазығым бар еді?» деп, меніреу дүниеге сұрақ қоюшы еді. Ауыр өксікпен курсініп, кеудесін жарған уайымның жалынын, ешкімнен жауап қайтпайтынын білсе де, анда-санда дауыстап айтып отырушы еді.

Ғазиза да екі шешесімен қосылып, жүректерін жеген қайғыларын сыртына шығарып сөйлескенде, бұрынғы өткен күндерін сағынушы еді. Кемпір оны да еске түсіріп: «ол күн де бір дәурен екен ғой, Жақып тірі тұрғанда кімнен кем, кімнен қор едім!?!» деп, ах ұрып алып: «ендігіні айтсаңшы, тістегеннің аузында, ұстағанның қолында кетіп отырған» деп, үнсіз жылайтын.

Күндегі әдетпен белгілі уайымның соңында бейшара әйелдер отырғанда, ауыз үйдің есігі ашылды. Үшеуі бірдей: «бұқ кім?» десіп есікке қарағанда, бұлар отырған үйдің де есігі ашылып, үйге түлкі тымақ жақсы киімдер киген екі қонақ кіріп келді.

Ғазизаның соқыр шешесі Ғазизаны тұртіп, қонақтың кім екенін сұрады. Ғазиза қонақтар келген жердегі таңданған пішінмен ақырын: «Білмеймін, танымаймын!» деді. Қонақтар киімдерінің қалған қарын қағып, төрге шығып отырған соң, асжаулық әкелгізді. Ақан құран

оқыды. Артынан Ақан да, Қалтай да үй ішіне амандасып, кемпірge қарап:

- Құдай ісі сыпайышылық, ақырының қайырын берсін! - деп, жайлап көңіл айтты.

Үй іші қонақтар алғашқы келгенде таңданса да, артынан пішіндерін, қалыптарын көрген соң, жетімдік халдеріне мүмкін болған дәрежеде көңілденіңкіреп, жадырап, шамаларынша серги бастады. Еркектері өлгеннен бері қалған әйелдердін уайымынан босаған шағы осы бөтен кісілер келгенде ғана болатын. Одан басқа уақытта үшеуі үйде оңаша отырғанда, жетімдік-жалғыздық та, қорғансыздық-сорлылық та көздеріне айқын көрініп, көңілдерін мұң мен зардан айықтырмаушы еді. Сол ретпен қазіргі қонақтар келгенде де, қабактары жадыраған себебі осы еді.

Қонақтар шай ішіп, жайланып болды. Кемпір ауыл аксақалы - басты еркектерше қонақтармен әр нәрсе жайынан жақсы сөйлесіп отырды. Кемпірдің байсалды сөзімен қонақтарын құрметтегісі келіп отырған ықыласын және қайратты жүзін байқаған соң, Ақан да әр нәрсенің жайынан сөйлесуге жалықпайтын сияқтанып отырды. Басында қала жайынан, ел жайынан қысқа-қысқа хабарлар айтып отырған Қалтай еді. Шай артынан екі қонақ көбінесе кемпір сөзіне құлақ салып отырды. Кемпір қонағы - бір елдің болысы болған соң, оның үстіне сөзінің салмағы бар жуан ауылдың баласы болған соң, екінші, әрлі-берлі өткенде, бірде болмаса бірде сөзім, ісім түсер деп, өзінің баласы өлгеннен бергі жайын білдіріп қоюды ойлады.

Осы оймен өзінің жай-күйін айта бастады. Кемпірдің әңгімесі шешен ұғымды тілмен ұзак айтылды. Даусын біресе тиісті жерде

қатайтып, өңін ажарландырып, бірсеке ақырында келіп, аяғын сыйырлап жеке-жеке айттып, ұғымды қылышп, барынша көніл-іждиһатпен айтты. Әңгіме «әлпеті өлер алдындағы қоштасып отырып айтқан немесе бір үлкен мархабат күткен кісісіне жаны қысылған уақыттағы үміт, тілек қылышп айтқан сөзге ұқсайды. Ақанға қарап, қабағындағы кірбені жадырап, сөз бастады:

- Қарағым, біздің хал-жайымыздың шет-жағасын көріп-біліп отырсың ғой, - деп, тағдырдың барлық сұғына, зардабына, азабына шыдаған, шынықкан қайратты, сабырлы пішінмен курсініп алды.

- Біз жетім-жесір қалған панаыз бейшарамыз. Барлық дүниенің тауқыметін арқалап қалған жас балам - анау, Мен болсам - сарнаған тілімнен басқа түгім қалмаған, қайратым қайтқан, бір аяғым көрде, бір аяғым жерде тұрған қуарған бір кемпірмін. Екі көзін алыш, құдайым мүгедек қылышп қойған келінім - анау. Өзіне күтуші керек қылышп отырған ол - бір сорлы. Әрі өтіп-бері өтіп жүргенде, сондайлық бишаралар еді-ау деп есіне ала жүрсін деп, айтышп қояйын деп отырмын. Күндердің күні болышп жүдеп-жадап, біреуден зорлық, біреуден корлық көріп отырған үстіне келсен, көзіңің қырын саларсың. Жайымды айтышп қояйын: ең болмаса - жылы сөзінді айтарсың. Бөтен елдің жұмысына не сөз айтам демессің. Сендердің сөздерінді тастай алатын Уақтың баласы жоқ қой. Бұл арада отырған елде адам секілді адам бар ма? Ұрғашы секілді жыбырлаған ұсақ. Қорыққанына ғана жауап беріп, қорықса ғана айтқаныңды істейтін сұмдар емес пе?! Міне - менің Жақыбым өлгеніне екі ай болды. Біреуі туысқан болышп, бишара, жайың қандай, шаруаң не күйде деп, есіктен қарады ма екен. Қайта үйімізге келсе, шетінен тысырайшып,

жуанымсып келеді. Ылғи жетім-жесір деп, қызығып анталап, бір нәрсемізді аузына түсіріп алғысы кеп тұрады. Ұялмағылар ұялмастан бізді жегісі келіп тұрады. Мен сорлы балам өлгеннен бері солардан көрген зор-лығымды айтайын деп отырмын.

Жақып өлді. Одан бір жұма кейін, жығылғанның үстіне жұдырық деп, Мұқашым өлді. Күндіз-түні жылауда болып, есенгіреп отырғанымызда, енді бұл үйдің еркектері кетті, ылғи ұрғашы үй болып отыра алмайды; дүниесін бөліп аламыз; қатындарды әрқайсымыз қолды-қолымызға аламыз деп, балаларымның бет топырағы жасырылмай жатып, сұық сөз жүргізді ғой. Баламның тірі күнінде ағайын ішінде жақын көріп, бауырына тартып, қолына түскен азын-аулағының жартысын жырып беріп жүрген жар дегенде, жалғыз сенген Ысмағұл не қылды? «Жақып өлгенде бата қылушыларға мен қойымды сойғамын» деп, Мұқашым қысылып жатқанда, даладан ет таусылса, сойып аламыз ба деп жүрген жалғыз ту қойымды әкетті ғой. Мына келінім: «Шаруаға ие болатын кісімсіп қоқақтамасын, одан да Жақыпты жоқтауын білсін, малға ие болам деп жүр ме өзі?!» деп айтады дейді.

Менің балам тірі болғанда, соның тіршілігінен аужал алып, телміріп отыруши еді. Балақтағы биттің басқа шыққанын көрмеймісің? Бұлар үшін қарағым не көрмеді? - дей келіп, қабағын көтеріп күрсініп алып: - сол тірі болса, маңына келе алар ма еді? Бөрінің де... боғын жуып, жақсысын асырып, жаманын жасырып, адам секілді қылып, осы ауылды адам қатарына қосқан сол емес пе еді. Жоқтығына қарамай, үйін - базар, түзін той қылып, думан қылып отырудан босаушы ма еді. Момындығы, биязы сыпайылығы қандай

еді, топырағың торқа болғыр, қарағым! Мына жамандардың ішінде оның тырнағына татитыны бар ма? Жақыбым осы жолы ауырғанда солардың кеселінен ауырған жоқ па! Менің қайнымның мылжың Дүйсен деген баласы бар ғой. Қатынша жыбырлағаннан басқа, істейтін адам сияқты бір мінезі, бір ісі жоқ. Жаннан асқан дүниеконыз. Үйіне бір қонақ қонса, соған асқан бір жілікке жаны шығып, тыжырынып отырады. Үйіне қонақ қонған күні қатынына тыныштық жоқ: етті көп асасын, мені құртасың деп, мыжиды да отырады. Соның үйіне қыс басында Шұбарадырдың көп ұрыларының біреуі келеді. Мылжың: тамағым жоқ, жатқызатын жерім жоқ деп, тұн ішінде, боранда қуып жіберген. Ежелден Уақты кісіғұрлым көрмейтін; екі сөздің бірінде: «шауып алам, айып алам!» деп тұратын. Өктем елдің баласы бұл қорлыққа шыдасын ба? «Өлмесең - өрем қап» деп, далаға тентіретіп жіберген соң, сол тұнде келіп, қорасын талқан қылышп жарып, төрт-бес семіз қойын, малға мініп жүрген екі атын алып кеткен. Соған өзі ізден баруға қорқып: «барсам, тағы атымды алып қояды» деп, Жақыпқа келді ғой. «Сенімен ол елдің басты кіслері таныс, сөзінді тастамайды. Менің малымды көрнеу қоя беріп отырамысың?» деп асылып отырып алды. Жер-жебіріне жетіп ұрсып:

- Құдай сүйер қылышың жоқ. Қазанбұзар үгентөксің. Kicі ығысатын айдының жоқ, неменесіне жуансисың?! Бір күні болмаса, бір күні керек ағайыннан жалғыз жілігінді аяйсың. Жуан болсан, мықты болсан, осы Арқалықтың түбінде өткен-кеткен біреумен ырылдасып неменеге отырсың? Дүниенің астын үстіне аударып, сенің болысынан оның ұрысы жуан болып отырған Тобықтыға сенің жол үстінде тұрған жаман лашығың жүк болып па?! «Өтпес жарлық -

бойға қорлық» екенін әлі күнге неге білмейсің? - деп, жерден алып, жерге салды.

Аяғында, мойнына су құйылып: «Өзіңен басқа сенерім жоқ» деген соң, әлгі иттің малын іздеп кеткені ғой. Табандаған жиырма күн жүріп, табанынан таусылып, бармаған кісі қоймай, аяғында бар малын алып келді. Ұрысы жуан ауыл екен. Басында ел кіслерінің сөзіне көнбей, «Дүйсен мылжыңың ызасы өткен» деп, қасарып болмапты. Сонан соң елдің басшы адамдары: «Мұнымен құда бол, әйтпесе малың тимейді» деген соң, мылжыңың 9-10-дағы қызын ұры ауылдың соқталдай бір азаматына бермек болып, сөз байлап, малын алып қайтыпты. Сол ұрымен осы күнде бал жаласқан құда болып отыр. Жақып сол жолда сүyk өтіп, өні қашып, қу шүберектей болып келді. Артынан, немене, екі-үш күн өткен соң қатты жығылып, төсек тартып жатып қалды. Аяғы, мінекей - мынау болды. Жә! Сол мылжың осы күнде не істеп отыр де?

Менің балам қолының қысқалығына қарамай, анаған да, мынаған да араласып, ертеңді-кеш қарап отырмай, сауда қылатын еді ғой. Біреуден аткөпір қылып алып, біреуге аткөпір қылып беріп жүретін. Кімге не беріп жүретінін білеміз бе? Қарағым, кейде сыр қылып, не істеп жүрсің деп, саудасының жайын сұрағанда, күліп: «Апа, соны неғыласыз, мен тірі болсам, аштан өліп, көштен қалам деймісіз» деп жүре беруші еді. Бүгін басыма күн туған соң, біліп отырмын ғой. Эйтпесе ішкен-жегеннен басқаны біліп пе едік? Жалғыз-ақ өтетінінен бір күн бұрын қолына қағаз-қарындаш алып, есеп-қисабын жазды. Қағазының есеп-қисабын көрсеткенімде, жүрттың айтуынша, бересісіне қарап, аласысы да бар екен. Балам

дүние салып жүре берді. Артында қалғанын есептеп отырып, қақ жартысын өзінің жабдығы мен бересісіне шығарттым. Осы күнде қолымызда қалғаны - он шақты түяқ, екі-үш қана ірі қара. Елдегі аласысын бұл күнде іздел алар бізде дәрмен жоқ. Сонда жүртқа беретін бересісін есепке салып төлегенде, өз елімнің Мәрден деген пұшығына бермек үш қараның сомасындай борышы бар екен. Әлгі құрғыр ойымыздан шығып кетіпті. Он шақты күн болды, сол келіп, малын сұрап жүр. Біздің қолымызда қалып отырған азын-аулақ малы - мынау. Одан берейік десек, шұбырып кеткелі біз отырмыз. Қарағымның мойнына қарыз ғып, өзі жинаған азын-аулағын өзінің сауабынан аялын деп отырғаным жоқ. Жалғыз-ақ дүниесі құрғырдың тарлығы жалтаң көз қылып, өлтіріп барады. Елден баламның аласысын жиып алғанша деп сөйлессем, жай-жапсарымды айтсам, пұшық тоқтайды. Бірақ соны маған сөйлестірмей, әлгі Дүйсен деген мылжың бар, тағы толып жүрген Бөрала секілді туысқандарымыз – бәрі бас қосыпты. Сөйлескен сөзі мынау: Мәрден - Тобықтының жуан аулының кісісі, ол ақысын сіңіртпейді. Және ол Жақып үйінің жай-күйін біліп отыр: оларды жылатып еш нәрсе алмайды, түбінде осының пәлесі бізге түседі. Басы аман, малы түгел, Жақыптың отына бірге күйетін жақыны деп бізді ұстайды. Біз бұдан басымызды амандап құтылмасақ болмайды десіпті. Соған жасап отырған айласы не деші? Қарағым, айтуға ауыз бармайтын сұмдық. «Тышқанның өлгені - мысықтың ойнағаны» деп, ендігісі - қалған көзімнің қарашығы - жалғыз Ғазизамды жылатпақ. «Кешегі Жақыптың аруағы лағнет оқымасын, Мәрденді де жылатпайық: биыл бұның қатыны өлген, Ғазизаны соған берейік» деп айтады дейді.

Кеселділердің осы сөзін естігенде, мына отырған балам зарлап қоя берді...

Осы сөзді айтқанда, кемпір маңайындағы жауыздықтың бәрін айқын көріп, өздерінің сол жауыздықтың қолында бір ойыншық болып отырғанын көріп, ызамен көзінің жасы сорғалап ағып кетті...

Ақан мен Қалтай бұл әңгіме айтылып отырғанда, жайланып шынтақтап, жантайып жатып, анда-санда көздерін Ғазизаға жіберіп қойып, қадағалап қарап отырды. Кемпірдің сөзін жалықпай тындалп отырса да, Ғазизаға қарай қалған пішіндерінде көңілдегі бір алаңдық пен іштеріне жасырынған жат ойдың белгісі көрініп тұр. Ғазиза анда-санда ауыз үйге шығып, отты қағыстырып және басқа әр түрлі ұсақ шаруаларды қарастырып келіп отырды. Қонақтар алғашқы келгендердегі кейіс Ғазизаның қабағынан әлі жадыраған жоқ. Жалғыз-ақ айрықша сыпайылығы және үндемей ақырын жүріп, биязылықпен істеген істері ішіндегі сырын сыртына шығармай, жасырыңқырап отырды. Кемпір қызарған көзін сұртіп, әңгімесін қайта қозғады. Ендігі даусы ашулы, қатаң келді:

- Кешегі баламнан қалған жалғыз көзім - бұл жылаған соң, бізде не тақат тұрады. Бұны жылатқан соң, қуарған қу өмірдің не бағасы бар? Сол сөзді айтқызып отырған сұмдарды қарғадым, ұрыстым. Одан басқа біздің қолымызда не тұр? Жыластық, аяғында, сонымен қойдық. Міне: екі-үш күн болды, сол пүшық әлі күнге кеткен жоқ дейді. Енді әлгі мылжыңың қатыны жеңгетай болып жүрсе керек. Менің қарағыма келіп айтады дейді: «шешелеріңе жаның ашыса, Мәрденге барғаның жөн емес пе? Сен жігіт болып, осы үйіңнің жұмысын басқарып отыра аламысын? Онан да өзің біреуге сүйенген

болсаң, сен сүйенгенге шешелерің де сүйенеді ғой» деп айтады дейді. Сөзінің қыршаңқысын қарасаңшы! Мен сонда баламды бір пұшыққа бермек пе екем?! Қатынының, мылжыңың өзінің ойы да менің балам көнсе, пұшыққа жетектетіп қоя бермек болса керек. Қасиет бар ма оларда! Кәпірстан болмаса - ойласайшы! Менің үйім - осы ауылдың үлкен үйі. Бүгін сол қарашаңырағының құруға айналып отырғаны - мынау. Құрымағанда, кім қалды? Бұл үйдің жайын ойласа, тұмсығы тасқа тиетіндей болған жоқ па? Ендігі қалған біз қалқыып: «баламның ізін жоғалтпаймын; орнын сақтап, құранын үзбейміз» десек, соны ұқпайды. Ұқса да өзінің құлқыны үшін «осы айтқанынды істептеймін» деп анталап, қолымыздағы азын-аулаққа көзі тұнып, соны бөліп алуға асығады. Әлгі менің баламды ана пұшыққа беріп жібермек болып жүргендегі ойы не деші? Қарағым, бүгінгі дүниеге ие болып, қалқыып, осы азын-аулақ шаруаны ұстап отырған Ғазиза ғой. «Осыны бірдеме қылыш көзден таса қылсам, мына кемпір мен ана көзінен айрылып отырған қатын шаруаны ұстай алмайды; мұнан соң бар малымен, дүниесімен өз колыма тиеді ғой» дейді.

Менің баламның жылағаны оларға не керек? Жақыптың аруағы ырза болмай, күніренгені не керек?! Қу құлқынын ырза қылса - болады. Мінекей - «қас жаман қасындағысын қарақтайды» деген осы. Көрер көзге моп-момын, мұп-мұләйім болып жүрсе де, ол мылжыңың іші осындай. Кеудесі толған - борсып жатқан бықсыма арамдық. Артынан естідік-ау, қарағым, тағы: «баласы баруға ырза болса - болады, - деп айтады дейді. - Ол ырза болса, қатындарға сөз салмай, баланы міңгестіріп қашырып жібереміз» дейтін көрінеді. Мінеки, қарағым, осы айтылып отырған дұспанның дұспандығын

ойлағанда, онсыз да қаңғырып отырған басымыз дал болады. Дүниенің барлық таршылығын ойлағанда, ақылымыз алтыға, ойымыз онға бөлінеді. Осылардың осындай қорлығын ойлағанда, осы жерде өле қалғым келеді...

Кемпірдің көзінен тағы да жас моншақтап домалап, алдына тұседі.

- Құдайдың менің өз басымнан, менің ұрпағымнан аяған қазасы бар ма? Жасымда шешем өліп, өгей шешенің қолында қалып, жетімдіктің зарын өзім тартып едім. Содан өмірім жылаудан, күйіктен арылған емес. Енді қартайып, төрімнен көрім жуық болғанда, құдайдан ертеңді-кеш тілейтінім: «Жақыбымның жаманатын естіртпе, осының алдында ал!» деуші едім. Ол тілегімді іstemеді, - деп, көзінен бетіне аққан жасын жеңімен сұртіп, мұрның сіңбіріп: - тілеуі құрыған сорлы мен бұл күйік, бұл дерпті көргенше, шірісем едім!» - деп, сөзін тоқтатты.

Кемпір барлық мұң мен шерін айтып отырғанда, бір қалып, бір пішінмен тыңдалап отырған Ақан әңгіме біткен соң, басын көтеріп алып, кемпірді жұбатпақ үшін аз сөз айтты. Сөзін шала естірлік қылып, ақырын айтқан соң, ұғымсыз бірдеме болды. Сөзімді адамның жүрегін шаныштырып тіксіндіретін, жұртты мінезінен жирендіретін, түңілтетін көрнеу жауыздықтар, ауыр халдер Ақанға кеп әсер бере қойған жоқ. Жалғыз-ақ сол әңгіменің ішінде болып, қорлық көруші, ыза шегуші, қайраты-қуаты жоқ сорлы кемпірдің өзі айтқандығы азғана жүрегінің тыныштық, сезімсіз қалпын бұзғандай болып отырды. Бірақ күндеңі өмірінде бұл секілді талай жауыздықты көріп, өзі де сондайлардың ішінде болып жүргендіктен, мына естіп отырған

сөзінің бәрі көңліне таныс, таңғаларлық тамашасы жоқ. Оқып кеткен сабағы секілді болды. Кемпір бәрін айтып жылап, қызы мен келіні ішінен тынып, қайғы жұтып отырған күйін ойлағанда, азырақ сілкінгендей болып: «осыған жанашырлық-ау!» деп, жүрегін зорлықпен жұмсатайын десе де, аздан соң сезімсіз салқын қалпына қайта барып отырды. Бұл адамның іші жақсы сезімге жат болып кеткен бір күнгірт дүние сияқты. Өз басына келген, болмаса, бөтен кісінің басына келген ауыртпалық пәле болып көрінбейді. Оның тартқан қасіреті көңліне қонбайды, сезіміне сіңбейді, тіпті ұғылмайды.

Бұл сағатта кемпірдің жүзіндегі қалың уайым жүрегінде қандай толқын барлығын көрсетіп тұр. Әңгімесін аузымен тоқтатса да, көңлінше соның аяғын тағы да созып, түкпірлеп ойладап, қайғының қабат-қабат шыңына ақылымен кіріп отыр. Бұл уақытта ойладап отырғаны - өтіп кеткен күн емес, алдында келе жаткан күннің жайы. Кемпір келешекте көзі көретін ауыртпалықтың, қайғының бәрін де көз алдына анықтап келтіріп, ішінен: «осының бәрін көретінім рас, осындаі азап, қасірет тартатыным шын» деп бас иіп отыр. Бірақ адамның жүрегін пішінінен танитын кісі болса, кемпірдің жүзіндегі халді көргенде, еріксіз бұл адамды көңлімен құрметтегендей еді. Дауылдың қара бұлтындаі болып, әдейі басына арналып келе жаткан қайғы-қасіретті көріп, соның алдынан айласыз-әлсіз күйде өзінің отырғанын біліп тұрса да, кемпірдің жүзінде үлкен сабыр бар. Күйіп-пісіп жасығандықтан белгі жоқ. Сынбаған ажар, қажымаған қайрат, кең салқын ерлік бар.

Акан Ғазизаға алғашкы кезде көп қарауынан әлі күнге танған жоқ. Кемпірдің көзі өзінен ауғанда, оның көзі тек Ғазизада болып отыр. Көңіліне орнаған ойын қараған сайын, пішінімен мағыналандырып, Ғазизаға білдірмек те. Бірақ көңілі бұзылып, жаманшылықтың бетін көрмеген Ғазиза ол қарасты ұғуға шорқақ болды. Ол өз пішінімен еш нәрсенің белгісін берген жок. Ақан көп қарағанда, ол қымсынып, қысылыңқырап, биязылығын сақтауды ғана ойлады. Біраздан соң ас пісті. Кемпірдің сыйламак болып салғызған тәтті-дөмді тәуір еті қонақтардың алдына келді.

Бірталай уакыт өтті. Қонақтар тамағын ішіп жайланаңып, біраз отырған соң, жатуға ыңғайланып, тысқа шығуға айналды.

Кемпір қонақтарды өуелдегі сый керген, құрмет-теген көңілмен Ғазизаға: «Қарағым, қонақтардың атына шөп керек кой; өзін шам алып бірге шығып, шеп алатын жерді көрсетіп бер» деді.

Ғазиза бұрын ойына еш нөрсе келмесе де, Ақанның көп қарағандығынан сол арада сескеніп, біраз үндемей түрді. Аяғында шықпасына болмайтын болған соң, шешесінің сөзіне зорға көніп, қонақтардың артынан бұл да шықты,

Ақан Ғазизаның үйінде отырғандағы ажарынан үміттенерлік еш нөрсе көрмеген соң, тысқа шыққанда Қалтайға сыйырлап, жасырын бірталай сөз айтты. Қалтай басын изеп, сөзін мақұлдады. Ғазиза бұл оқиғаны көрген жок. Артынан біраздан соң, Ақан қораның ішіндегі бір есіктің аузында қалып, Қалтай мен Ғазиза шам ұстап, пішен қораның ішіне кірді. Пішен қораның бұл жері қораның ішінен қатынасатын, жанада желініп жүрген кішкене үңгір еді. Барлық кендігі бір-ак кісі сыйғандай, төбесі аласа бір қуыс. Ғазиза шам ұстап

ауызда тұрды. Қалтай пішен қораның ішіне кірісімен шөпке карамай, үлкен жұмысы ол емес, баска нөрсе екенін сездіріп, өні өзгеріп, өтірік құліп қуланып, әдепсіз мінезге түсіп, ойындағы дайындал алған сөздерін сөйлей бастады. Ғазизаның алдында сескенген ойы Қалтайдың не айтпағын сезіп, қатты ашуланып, бір жағынан, намыстанғандай болып, сезінің аяғын бітіртпестен:

- Сенің ойындағы сүмдығынды білмей түрмyn ба? Аулақ жүр!  
Мен сенің мазақ қылатын кісің емеспін! -деп, лампыны жерге қойып, женеле берді. Қалтай күтпеген сөзді естігенде, басындағы құліп түрган пішінін жия алмай, оның ұстіне аңырайып аң-таң болып, ойына еш нөрсе келмей, біраз тұрып қалды. Ғазиза сол бетімен жүгіріп, екінші қораның есігінен шыға бергенде, есік алдында екеуінің сөзін естіп түрган Ақан ұстай алды. Ғазизаның әуелде үрейі ұшып кетіп, есін жиып алғанша, Ақан көтеріп пішен қораның қуысына алып келді. Қалтай шамды өшіріп жіберіп, қораның ішіне қарай кетіп калды. Дүниені қараңғылық басты.

Ғазизаның үрейі ұшып, жүрегі тулап, есі шыққан-дай болып, сезімнің бөрі жоғалып, жалғыз-ақ «құтылсам-ау!» дегенді ойлад, кайта-қайта қатты жұлқынып ұмтылды. Сезімі жок, қатты ұстаған мықты кол рақым ойлад жібермеді. Еріксіз өз еркіне көндірді. Жалғыз-ак қараңғы қуыста жалынған, жалбарынған, бірсек есі кетіп, жүрегі жаншылып, үзіп-үзіп жылаған дыбыстар келеді. Сезімі жок жауыз қара күштің қылған күнәсі мен зұлымдығына қатты тон жер, сұық балшық, көрдей қап-қараңғы дүние куә болды.

Қалтай алғашкы бетімен токтай алмай, қақпаны ашып тысқа шықты. Жел күндізгісінен қатайған. Күн алақаншықтап катты борап

тұр. Қалтай күресінге таман шығып еді: гүлдеп, екпіндеп соққан қатты жел дедектетіп, бетіне ұсақ қар себелеп ығын кетірген соң, қайтадан кораға кірді. Алдынан ентігіп, беті дуылдал қызырып, жаңа болған құмарлықтан бұзылған түрмен Ақан шыға келді. Екеуді де сөйлескен жок. Бірақ көңілдегі істерін айтыспай-ақ ұғысты.

Ғазиза зорлықтан босанғанда, есі ауынқырап, көңіліне дүние дүниелігін жоғалтқандай, өзінен алыстап бара жатқандай болып көрінді. Бұл сезім - бұл уақытқа шейін көңіліне келмеген аса жат бір сұық сезім. Биіктен тайғанап құлап келе жатқандағы сезімдей, бір түрлі шолақ, ұғымсыз. Не қыларын білмей, өксіп-өксіп жылап, жерден басын көтерген қалпында отырып қалды. Бірталай отырған соң, ептең есі кіре бастағандай болды. Бірақ есі кірген сайын, ойына келген нәрсе өзгеше сұық түрде. Әуелі әкесі өлгеннен бергі басына түскен ауыр хал түгелімен көз алдына тез елестеп өтті. Ақырында соқыр болып, мүгедектеніп отырған шешесі, қартайып, қайратынан айрылып, кемтар болып отырған кемпір әжесі есіне тұсті. Басында бір ойына келген нәрсе - шешелеріне барлық көрген қорлығын айтып, жылап, зарлап жату еді.

Артынан әлгілердің әлсіздігін ойлағанда, іші құсаға толып, жас жүрегі жаншылып, бұл күнге шейін көрмеген азабын тартты. Жас күнінен бір үйдің түгелімен еркелетіп, алақанына салған баласы. Ешуақытта қанаттыға қақтырып, тұмсықтыға шоқытқан емес. Жүргінде ар-ұят та, жігер-намыс та бірге өскен. Кедейлігінен, қорғансыздығынан басқа міні жоқ, салмақты, таза тәрбиелі бала - бұл күнде сол не көріп отыр?

Әкесі өлгеннен бергі: «ә, құдай, біреудің зорлығын, қорлығын көрсетпе!» деп, тілеген уыз тілегі қайда кетті? Бұрынғы бейнет, бишаралық былай тұрсын, мынау көрген мазақ не? Осынша қорлау, рәсүәлау не? Әуелден бергі қазаны көруіне осы қаршадай жас баланың не жазығы болып еді? Бүгінгі өмір бойында құлағы естімеген зорлық, зұлымдықты көруге не жазық қылып еді? Қандай арамдық, не бұзық құлқы болып еді? Ешбіріне жауап жоқ. Бірақ қайда жүрсе де, артынан көлеңкесіндей қалмай жүрген бір сорлылық, бір жылау.

Осы айтылған сөздің бәрін Ғазиза мұндайлық толық қылып ойламаса да, әрқайсысын көңілмен жүйрік аралап өтті.

Осыны ойлаған сайын, жүрегін ыза керней бастады. Көңілдегі құшті намыс сілкініп оянғандай болды. Барша басынан кешірген жетімдікке, бейнетке, жалғыздыққа, қорлық-мазаққа түгелімен қарсылық ойлады. Өмірінде сыртына шықпаған ашу, ыза, намыс барлық еркін билеп, дуылдалап басына бір-ақ шықты.

Корлық, мазақ көрген Ғазизаның көзінен дүниенің барлық қызығы кетті. Жастығына лайық болған үміт, қиялдың бәрі де ойын басқан қараңғылыққа батты, көңліндегі өмір сұрсем деген оттың ақырғы жалыны сөнді.

Ғазизаның көңлін бұл қиял кернеген сайын, үйге кіру керексіз бола бастады. Көңлінде қалған таусыншық сезімнің ойлатқаны: енді үйге кіріп қайтемін? Үйде мен көретін не қызық қалды? Бишара болған шешелерім ақырғы қайғымды көрмей-ақ, білмей-ақ қойсын! Қайғылы бір сыр көрге бірге-ақ кетсін дегендей болып, тысқа шықты. Құн әуелгі қалпынша: актүтек боп борап тұр. Біресе өкіріп, біресе

гүлдеп, құтырынып ұйтқып соққан қатты жел Ғазизаға: «жүр-жүр!» дегендей болып, дедектетіп алыш жүріп кетті.

Ғазиза кетіп бара жатып, ойланып артына қарап, бишарагыңын кебінін киген кішкене ескі қорасын көрді. Ұйтқып аспанға ұшқан ұсақ қар жүрген сайын көзінен ол қораны жасырып барады. Үстінен ұскіріп соққан қатты жел қарды айналасына төгіп, оны да көмбекші. Бейшаралық, иесіздіктің таңбасы басылған ескі лашықтың ішінде Ғазизаның балалығы, еркелігі жөне қайғысы, қасіреті қалды. О да бірге көмілмек. Барлық жүрегіне жылы жақындары, нәзік қылып есірген ұясы қалды...

Ғазиза енді сұық, қатал табиғаттың еркінде. Өмірінің ақырғы қалған жанары қай жерде, қай уақытта сөнері белгісіз. Сұық жел жұқа киімнің ішіне кіріп, кеуlep, ығын кетіріп, жауратып, ықтыра бастады. Ғазизаның көңілінде қалған ойдың ең ақырғы бұйрығы: әкесі мен бауырының бейітіне барып, екеуінің арасында отырып зарлау!

Дүниеде жетім болып, жалғыз қалғандағы басынан кешірген қасіретін шығару, азабын, дертін айту. Ғазиза бейітті бетіне алыш: «А, құдай, ендігі бар тілегім - осы әкемнің басына жеткіз!» деп, жүріп кетті.

Біз Ғазизаны шығарып салып, үйдегі әңгімеге келейік. Ақан әуелгі бетінде тысқа шығып, өзгелерден бұрын үйге кіріп, жатып қалды. Бірақ тыста болған әңгіменің немен тынарын білмей, біресе құдіктеніп қорқып, біресе азын-аулақ өкінгендей болып, тынышсызданып, қорғалақтап жатты. Ғазиза келетін уақыт болды. Бірақ көп уақыт өтсе де, келген жоқ. Аздан соң кемпір де, келін де «Ғазиза қайда жүр» деп таңғалыңқырап жатты, аяғында тысқа шығуға

айналды. Сол уақытта атты суарып келіп, шөбін салып, жайлап болған Қалтай да үйге кірді. Үйдегілер түгелімен: «Ғазиза қайда?» деп шу ете қалды. Қалтай саспаған, сезігі жоқ пішінмен: «Бағана кетіп еді ғой, келмеді ме?» деді.

Кемпір де, келіні де тынышсыздана бастады. Қалтай бұл жұмыстан ерте бастан өз бастарын арашалап қоймақ болып, әуелдегі айта бастаған сөзінің жөнін баптап ұқтырып, бұл бір пәленің боларын алдын ала білгендей, дайындалған сөздерін сенімді қылып айтып шықты:

- Мен шөп суырған соң, құдықтың қайда екенін білмей, соны сұрадым. Балаңыз көрсетейін деп, қорадан бірталай жер ертіп шықты. Күн қатты боран болып, сұық болған соң, тоңып қалар дедім де, құдықтың бетін біліп алып, үйге қайтарып жіберіп едім. Әлде сонда қораны таба алмай, адасып кетті ме? - деп, аналардан бұрын сезіктенгендей, тынышсыздандай пішінге мінді.

Кемпір мен соқыр ана шошып: «Қарағым-ай! Үсіп кетер ме екен? Құдай-ай, тағы неге ұшыраттың?» десіп, киініп тысқа шығуға айналды.

Ақан да басын көтеріп, Қалтайға: «Тысқа шық, айналаны қара, айғайлап дабыста, тез бар!» деді. Әлсіз, кем-кетік әйелдер бірінің артынан-бірі ұстап, өндөрі бұрынғыдан да жаман бұзылып, құдайына қайта-қайта сыйынып, Қалтайдың артынан ере шықты.

Тұтеп түрган боран Қалтайдың сезін шынға шығармақ болып, құтырып тұр. Есік пен төрдей жердегі қарайған бұлдырап, жөнді көрінбейді. Ұйтқып келіп бетке жабыскан майда қар көзді ашқызбайды.

Кемпір күннің түрін көріп, назалы дауыспен: «Құдай, тағы төбемнен ұрайын деген екенсің ғой! Қарағым адасты ғой. Ұшып өлді ғой. Аруақтарым, қолдай гәр! Ақсарбас!» деп, баласын шақырып айғайлай бастады. Келіні де сүйенгені тілеуі, зары болып, қорқып тұрды. Қалтай қорадан ат алып мініп шығып, қайта-қайта айғайлап, шаба жөнелді.

Аз жерге бармастан қарасы өшіп, боранмен араласып көрінбей кетті. Айғайлаған даусы аз-ақ жерге естіліп, аздан соң о да үзілді. Әйелдер де, дауыстың естілмейтінін білген соң, ішінен зор қауіпке түсіп, зарлап тұрды. Бұлардың бар дәрмені - айғай болғандықтан, қайта-қайта айғайласып еді. Көп уақыт өтті.

- Е, тәңірі, жоқ болды, өлді, - деп, әйелдер зар салып, дауыс айтып, үйге кірді.

Бұрынғы қайғының бәрінен жаңа қайғы күшті болды. Өлді деуге көңілдері қимай, келер деген үмітті көбірек медеу қылайын десе де, көңілге кіріп қалған қорқыныш жүректерін билеп әкетіп отырды. Тerezеге тұтеп соққан қатты жел бір қалпынан ауған жоқ.

Бірталай уақыт өткен соң, дүсірлетіп Қалтай келді. Бірақ үйге жалғыз кіріп келген жерде-ақ енді еш нәрсенің болмағанына көздері жете бастады. Қалтай: «Өзім адасып кетіп, ауылды әрең таптым. Еш жерде жоқ» деді.

Әйелдер сол тұні таң атқанша шам жағып, ұйықтамай отырып, құдайдан тілек тіледі. Сыйынды, жылады. Бірақ ешбір көмек берген жоқ. Шыдай алмай зар қаққан сорлыларға қыстың ұзақ тұні жылдай болып созылды. Ақырында таң атты.

Қонақтар ерте қамданып, журуге ынғайланып жатты. Таңертең де қарап, еш нәрсе таба алмаған Қалтай маңайындағы ағайындарына хабар берген. Тұрып алыш, тез қамданған соң, Ақан кемпірдің қақсаған зарына шыдай алмай, аттарын дайындалап, жүріп кетті.

Жиылған ағайындары көп іздемей-ақ екі жас бейіттің арасында өлік болыш қалған Ғазизаның сүйегін тауып алды. Үстіндегі онсыз да жұқа киімдері әр жерге шашылып қалыпты. Ғазизаның шашы азырак дудырап қапты. Денесінің жартысын қар басқан. Әкесінің бейітіне жабысып, қасіретті өмірдің ақырғы қуатын сол жерде берген екен. Өлер сағатына шейін қабағын басқан қайғы бұл уақытта жадыраған ізі қалған жоқ. Балалық жүзінде: «Менде жазық жоқ, мен тазамын» деген ашық тазалықтың белгісі, қайғы-қасіреттен сейілген жас баланың ажары бар.

Жауыздықтың жас құрбаны қасіретке толы өмірінің азапты ақ түтегінен адасып өліп, мәңгі толас тапқандай.

1921.